

PPA a haya cu e bandera no ta simbolisa union di pueblo

(Pa: Juby Naar)

Tabata dia 16 di maart 1976, un dia prome cu inauguracion di Himno y bandera cu tabata tin un reunion di Eilandsraad riba Himno y Bandera.

Sr. Guillermo Trinidad di PPA, cu tabata lider di fraccion a laga sa den e reunion aki cu "locual lo wordo hisa ta un bandera cu en vez di refleha unidad di pueblo di Aruba, lo keda como simbolo di division di pueblo".

E tabata contra tambe cu e sistema cu e concurso a wordo teni indicando na mes momento cu e pueblo no a haya suficiente informacion y cu e ta den desacuerdo cu e criterio cu e comision lo a usa pa huzga diseñonan. El a haya cu e 693 diseñonan cu a ser entrega pa 16 di februari tabata sumamente pover pa un poblacion di 60 mil. El a haya cu 536 di e diseñonan no a bini na remarke pa e concurso y cu di e 157 cu a keda escohe e bandera, locual ta masha pover compara cu nos poblacion.

Den su relato na Eilandsraad, Sr. Guillermo Trinidad a bisa cu "na cierto momento e comision a yega na 3 diseño, for di cualnan un a ser escohi como favorito y e otro dosnan como alternativa".

Grandi tabata e sorpresa

despues, ora cu a dicidi di cambia y escohe 15 bandera cu despues di conseho di experto ningun a bin den remarca pa wordo acepta, el a laga sa tambe.

El a ripiti varios biaha cu e comision di bandera no tabata para cu lomba contra muraya pero cu lomba contra 18 di maart te cu e comision mes a dicidi cu nan mes lo traha un bandera y a bin cu 8 diseño di cualnan Eilandsraad por a scohe un pero cu locual a keda palabra a wordo lubida.

El a haya cu tin hopi cos cu lo a ser manipula y cu PPA ta distancia su mes di e asunto aki. "PPA no tin nada contra un bandera pa Aruba, pero tin un bandera oficial, esun di Antiyas y esun di Hulanda", el a bisa.

Tambe e lider di fraccion di PPA a laga sa den Eilandsraad e atardi ey cu "Pa motibonan di principio PPA ta vota contra di e himno y tambe contra di e bandera. E bandera cu e comision a diseña y cu MEP kier no ta haya nos apoyo ni cooperacion", segun Sr. Guillermo Trinidad cu a lamenta cu e bandera - segun PPA - no ta simboliza e union di e pueblo.

AVP NO TA APROBA BANDERA DI ARUBA BULANDO BANDA DI

ROOD WIT BLAUW

E tempo ey, AVP tabata representa den Eilandsraad pa solamente un persona cu tabata Sr. Rudy Frank, lider di partido, kende a expresa cu ta "lastima cu e himno Aruba Dushi Tera, ta ser usa pa metanan politico.

El a menciona den su exposicion cu den exterior cierto gritonan a resona proclamando cu independencia di Aruba lo haya su lugar dia 18 di maart, ora cu himno y bandera di Aruba ser inaugura. "Aruba no tin independencia, un independencia cu Aruba no kier. Bao protesta ami lo no yuda e partido aki (Nota: aki e kiermeen, MEP) den su wegá.

Sr. Rudy Frank e a muestra cu ainda Aruba ta forma parti di Reino Hulandes y a puntra ta ki balor e himno "Aruba Dushi Tera" lo haya banda di "Wilhelmus".

El a laga sa cu si tabata tin 21 miembro di Eilandsraad para tras di 18 di maart, e preparacionnan lo ta hopi diferente ya cu e preparacionnan actual ta laga hopi di desea.

E orador a bisa cu e lo vota gustosamente pa himno y bandera, pero e no por duna su apoyo na nan y ta contra "e proce-

dura dictatorial den e asunto aki cu despues a yega Eilandsraad y ta wordo bisa "vota p'e!" E lider di fraccion di AVP a puntra ta ki balor e bandera cu Bestuurscollege kier bin cune tin banda di e bandera Rood Wit Blauw cu pa siglonan largo tabata simbolo di defensa y seguridad y cu e "lo no aproba pa bandera di Aruba bula banda di e bandera Rood Wit Blauw como simbolo di MEP".

ESNAN CONTRA HIMNO Y BANDERA TA CONTRA DESEO DI PUEBLO

Sr. Betico Croes, riba e ponencianan di PPA y AVP, a expresa cu e balor di un himno y un bandera mester ta simbolo di nos identidad y cultura, muy en especial nos pueblo cu ta lucha pa su libertad, ta merece pa e tin su himno y bandera.

Sr. Betico Croes a suplica PPA y AVP pa separa dos cos, e determinacionnan den Eilandsraad di himno y bandera y e inauguracion di nan dia 18 di maart. Tur partido mester duna su cooperacion pa Aruba haya su himno y bandera pa Aruba haya su himno y bandera.

Sr. Betico Croes cu den e reunion aki no a haci uso largo di su oportunidad di papia a laga sa cu lo por tin diferencia riba fecha pero esey no ta al caso den e reunion.

E experto di Merca representando profesor Smith, Sra. Bollinger a repasa tur diseño hunto cu e comision y hunto nan a yega na un acuerdo riba colorman, strea, banchinan, y tur esaki tabata refleha den e concurso.

El a splica cu hasta un miembro di PPA, Sr. Domi Tromp a expresa su deseo den otro reunion di Eilandsraad pa yega na un acuerdo, y a elogia diputado Nelson Oduber pa su laboran.

"Esnan cu ta contra di himno y bandera a motibo di e fecha di in-

auguracion ta bay contra deseo di pueblo", Sr. Betico Croes a laga sa. E lider di MEP a laga sa cu e bandera "lo refleha e soberania di nos pueblo. Aruba kier ta soberano, Aruba kier ta independiente, Aruba kier ta liber!"

"Independencia, soberania y Status Aparte tin e mes contenido pa cual MEP a haya e mandato", Sr. Betico Croes a enfatisa.


El a duna un relato extenso riba significacion di e bandera, enfatisando cu e "comision imparcial" a traha riba e bandera cu sugerencianan cu PPA a trece dilanti.

Encuanto e color blauw cu "supuestamente" a wordo cambia el a bisa cu e "color no a wordo cambia. Eilandsraad a dicidi di acepta cierto color blauw y cu primordialmente MEP a bay tras di un color y a wordo aproba un U.N. Blue. (nota: el a remarca aki riba ponencia di Sr. Guillermo Trinidad anteriormente den e reunion di cu Bahamas Blue a wordo escogi y awor e ta tende di otro "Blue" menciona y cu tin posibilidad cu e bandera traha na Colombia no ta esun aproba pa e comision)

Sr. Betico Croes a suplica PPA y AVP pa no desapunta pueblo door di abstene di aproba e bandera cu ta simbolisando e anhelo pa Aruba su libertad, "simbolo di Aruba soberano".

E concepto di Raadsbesluit tabata riba mesa y Sr. Croes a afirma cu "e himno y bandera lo ta aproba y lo tin su base legal.

Di e himno "Aruba dushi tera", e lider di fraccion di MEP a bisa cu desde cu e cancion a wordo componi pa Rufo Wever y Padu Lampe y graba na 1954 pa De Trupialen, el a wordo considera como himno. "Hasta Cuerpo Policial ta para den houding ora cu e ta wordo toca", Sr. Betico Croes a splica.



ARUBA DUSHI TERA

Aruba patria aprecia,
nos cuna venera,
chikito y simpel bo por ta
pero si respeta

CORO:
O, Aruba dushi tera
nos baranca tan stima
nos amor pa bo ta sina grandi
cu no tin nada pa kibre? (bis)

Bo playanan tan admira
cu palma tur dorna
bo escudo y bandera ta
orguyo di nos tur?

(CORO)

Grandeza di bo pueblo ta
su gran cordialidad
cu Dios por guia y conserva
su amor pa libertad?

(CORO)

Pabien!!!

Cu nos Dia Nacional!!!!

Price Rite